

इवनिंग डोगरी न्यूज़ बुलेटिन

समे .18:15 Hrs

Headlines

- उपराज्यपाल मनोज सिन्हा होरें आखेआ जे जम्मू-कश्मीर खेड्डे आहले क्षेत्र च उभरिए अगगे आवा करदा ऐ। एहू गल्ल उनें अनंतनाग च बिजबिहाड़ा प्रीमियर लीग च शामिल होने पर आक्खी।
- मुखमंत्रि उमर अब्दुल्ला होरें नमी दिल्ली च FAITH Conclave च हिस्सा लैता ते जम्मू-कश्मीर दी सैलसफा सरबन्धी समर्थ गी उजागर कीता।
- औदे स्वतंत्रता दिवस थमां पैहले अज्ज पूरे प्रदेश च फुल ड्रेस रिहर्सल कीती गई।
- केंद्री राज्यमंत्री डॉ. जितेंद्र सिंह होरें कठुआ च आयोजित तिरंगा रैली दी अगुवाई कीती ते स्वतंत्रता सैनानिएं गी श्रद्धांजलि भेंट कीती।
- जम्मू-कश्मीर च कल विभाजन विभिषिका दिवस मनाया जाग ते सरबन्धी कार्यक्रम जम्मू ते श्रीनगर च आयोजित होडन।

LG-Cricket

उपराज्यपाल मनोज सिन्हा होरें आखेआ जे जम्मू-कश्मीर खेड्डें आहले क्षेत्र च टकोहदी ते मजबूत थाहर बना'रदा ऐ। एहू गल्ल उनें अनंतनाग च बिजबिहाड़ा प्रीमियर लीग च हिस्सा लैने मगरा आक्खी। एहू प्रतियोगिता केंद्र शासित प्रदेश दी इक महत्वै आहली क्रिकेट प्रतियोगिता ऐ। उपराज्यपाल होरें आखेआ जे एहू प्रतियोगिता युवा खडारिएं गी अगगे बढने ते राश्ट्री ते अंतरराश्ट्री सतह पर बेहतर करने दे मौके उपलब्ध करोआ'रदा ऐ। उनें खडारिएं कन्नै गल्ल कीती ते अपनी मेहनत गी अगगे बी जारी रक्खने ते जम्मू-कश्मीर गी खेड्डे आहले सैक्टर च अगगे लेई जाने लेई गलाया।

CM-Faith

मुख्यमंत्री उमर अब्दुल्ला होंरें नमीं दिल्ली च आयोजित .. गी संबोधित कीता। उनें जम्मू-कश्मीर दी सैलसफा सरबन्धी समर्थ गी दर्शाया। इस मौके पर बोलदे होई उनें आखेआ जे मेद ऐ जे पूरी तनदेई ते पक्के धेइयै कन्नै जम्मू-कश्मीर पूरी दुनिया दा किट्टे रलिए सौआगत करने आस्तै पूरी चाल्ली तैयार ऐ। एहू कार्यक्रम Federation of Associations in Indian Tourism and hospitality ते TAFI दे बैनर हेठ कीता गेआ। एहदा मकसद भारत दा इस भेठा नजरिया ते जम्मू-कश्मीर गी वैश्विक सैलानी थाहर दे तौर पर उजागर करना ऐ।

<><><><><><>

Full Dress Reharsal

जम्मू ते कश्मीर च अज्ज स्वतंत्रता दिवस -2025 समारोह गितै फुल ड्रेस रिहर्सलां कराइयां गेइयां। कश्मीर च मुख्य समारोह बख्शी स्टेडियम च होग ते जम्मू च मुख्य समारोह एम ए स्टेडियम च होग' जिन्दे च स्कूली बच्चें, पुलस, BSF, CRPF, NCC ते स्काउट गाइड दे दस्ते परेड च हिस्सा लैडन। इस मौके स्कूली बच्चें शानदार रंगारंग कार्यक्रमें दी बी रिहर्सल कीती, जेहडे अतरु 15 अगस्त गी समारोह दौरान होगन। जम्मू दे मौलाना आजाद स्टेडियम च आयोजित फुल-ड्रेस रिहर्सल च जम्मू दे जिला विकास कमीशनर राकेश मिन्हास होंरें परेड दी सलामी लैती। इस मौके DIG शिव कुमार होर बी मजूद हे। इस मौके पर बोलदे होई डी सी जम्मू राकेश मिन्हास होंरें

<><><><><><>

Tiranga-Rallies

आजादी दे ध्याड़े आहले समारोहें दे इक हिस्से दे तौरा पर समूलचे जम्मू-कश्मीर च केई कार्यक्रमें दा सरिस्ता कीता जा'रदा ऐ। इससै सरबन्धै च केन्द्री मंत्री डाक्टर जीतेन्द्र सिंह होंरें अज्ज कठुआ च इक बड्डी तिरंगा जात्तरा दी अगुवाई कीती जेहडी कालीबड्डी थमां लेइयै शहीद भगत सिंह पार्के तोहडी कड्डी गेई। खरी मती गिनतरी च लोकें,

देश-प्रेम दे जज्बे कन्नै इस जात्तरा च हिस्सा लैता। डाक्टर सिंह होरें इस मौके उप्पर म्हान सुतैंतरता सेनानिएं - भगत सिंह, राजगुरु ते सुखदेव होरेंगी श्रद्धांजलि दिती। इस मौके पर डाक्टर जीतेन्द्र सिंह होरें आखेआ

<><><><><><>

Partition Remembrance Prog

जम्मू-कश्मीर दा संस्कृति विभाग 1947 दी बंडु ते उस दौरान लक्खें लोकें गी जरनी पेदी तकलीकें गी उजागर करने लेई कल जम्मू दे कला केन्द्र ते श्रीनगर दे टैगोर हाल च बशेश कार्यक्रम दा सरिस्ता करा'रदा ऐ। विभाजन विभीषिका स्मृति दिवस दे रुपै च एह कार्यक्रम दौने थाहें परी कल दिनै 11 बजे शुरु होग। इस कार्यक्रम दे दरान ऐतिहासिक फोटूएं दी इक नमैश लाई जाहग जेह्दे राहें बंडु दरान लोकें गी झल्लनी पेदी तकलीकें गी दर्शाया जाहग। इस पैहलकदमी दा मकसद युवा पीढ़ी गी 14 अगस्त दे ध्याड़े बारै जानकार बनाने दे कन्नो-कन्नी बंडु दरान तकलीफां झल्लने आहलें गी श्रद्धांजलि देना बी ऐ। इस सरबंधै च आकाशवाणी समाचार कन्नै चेचे तौर पर गल्ल करदे होई मन्ने-परमन्ने दे इतिहास, लखारी ते राजनीतिक विश्लेषक प्रोफेसर हरि ओम होरें आखेआ

<><><><><><>

Prog. Announcement

इस्सै सरबंधै च आकाशवाणी जम्मू दे क्षेत्रीय समाचार एकांश आसेआ कल 14 अगस्त गी “विभाजन विभीषिका स्मृति दिवस” दे मौके पर 25एं मिनटें दी इक विशेष परिचर्चा दपैह्नी 12 बजे प्रसारित कीती जाहग। इस विशेष कार्यक्रम च स्थाड़े परौहने होङन मन्ने-परमन्ने दे इतिहासकार, लखारी ते राजनैतिक विश्लेशक प्रो. हरिओम ते पी.टी.आई दे जम्मू ब्यूरो चीफ अनिल भट्ट, जेड़े 1947 च भारत ते पाकिस्तान बश्कार होई दी बंड बारै अपने माहिराना बचार सांझे करङन। इस कार्यक्रम दा संचालन करङन साढ़े न्यूज एंकर जगमोहन शर्मा। एह कार्यक्रम तुस मीडियम वेव 303 मीटर यानि 990 किलोहर्टज़ ते एफ.एम 100 अशारिया 3 मेगाहर्टज़ उप्पर बी सुनी सकदे हो।

<><><><><><>

Ramban Food Safety

प्रदेश च तस्करी करियै आंदे जा'रदे घटिया किस्मै दे मांस सरबन्धी चैंताएं दे मद्देनजर रामबन दे खाद्य-सुरक्षा विभाग नै इक बशेश अभियान चलाइयै इस म्हीने 4 टन शा मते असुरक्षित मांस ते पोल्टरी गी जब्त कीता ऐ। इस कारवाई दा मकसद नियमें दी उल्लंघना करने आहलें दा पता लाइयै, उं'दे खलाफ खाद्य-सुरक्षा ते मानक कनून तैहत कारवाई करना ऐ। खाने-पीने सरबन्धी चीजें दी जांच आहली गश्ती वैनां, जिले दे बक्ख-बक्ख हिस्सें च जाइयै इस कम्मै गी बखूबी अंजाम देआ करदि'आं न। अधिकरियें गी निर्देश दित्ते गेदे न जे ओहू नियमें-कनूनें दी खलाफवर्जी रोकन ते इस गल्लै गी जकीनी बनान, जे लोकें गी बधिया म्यार आहिलयां खाने-पीने दिआं चीजां हासल होन। इस सरबन्धै च मती जानकारी दिन्दे होई रामबन दे खाद्य सुरक्षा अधिकारी बलबीर सिंह होरें आखेआ

<><><><><><>

Drug-Awareness Prog

केंद्री गृह मंत्री हुं'दे आसेआ जारी निर्देशें मताबक नशे दी रोकथाम सरबन्धी ब्यूरो आसेआ औंदी 15 कोला 16 अगस्त तगर नशे दी रोकथाम लेई इक राष्ट्रव्यापी जागरूकता अभियान दा आयोजन कीता जा'रदा ऐ। इस मुहिम दा मकसद लोकें गी नशीले पदार्थें दे माड़े असर बारै जागरूक बनाना ते “नशामुक्त भारत” दे संकल्प गी लेइयै सब्भनें गी किट्टे आहनना ऐ। इस दरान मुख्य भरै दे बक्ख-बक्ख शिक्षा संस्थानें च नशा बरोधी अभियान तैहत कार्यशाला, सेमिनार, पोस्टर बनाना, निबंध लेखन, प्रतियोगिताएं, नुक्कड़ नाटक ते सैकल रैली ज्नेही गतिविधियें दा आयोजन करोआया जाह्ग तांजे लोकें, खास करियै नौजवानें दी, भारत गी नशामुक्त बनाने लेई सक्रिय भागीदारी जकीनी बनाई जाई सकै।

<><><><><><>